



龜山先生集卷第一

詩一

此日不再得示同學

此日不再得頽波注扶桑躑躑黃小羣毛髮忽已蒼
願言媚學子共惜此日光術業貴及時勉之在青陽
行矣慎所之戒哉畏迷方舜跖善利間所差亦毫芒
富貴如浮雲苟得非所臧貧賤豈吾羞逐物乃自戕
胼胝奏艱食一瓢甘糟糠所逢義適然未殊行與藏
斯人已云沒簡編有遺芳希顏亦顏徒要在用心剛
譬猶適千里駕言勿徊徨驅車日云遠誰謂阻且長

末流學多岐倚門誦韓莊出入四寸間雕鐫事辭章
學成欲何用奔趨利名場挾策博塞游異趣均亡羊
我懶心意衰撫事多遺忘念子方妙齡壯圖宜自彊
至寶在高深不憚勤梯航茫茫定何求所得安能常
萬物備吾身求得舍即亡雞犬猶知尋自棄良可傷
欲為君子儒勿謂予言狂

書懷

少作

敝裘千里北風寒還憶簞瓢陋巷安位重金多非所
慕直緣三釜慰親歡

端午日

少作

悠悠南北各天涯欲望鄉關眼已花憶得親庭誰共
語應憐游子未還家

巖松

婆娑千尺倚巖巔隱隱虬姿拂遠烟尤喜地靈泉脉
潤獨愁天濶晝陰偏孤根礙石盤彌固直幹凌霜老
益堅臃腫不須逢匠伯散材終得盡天年

勉謝自明

少年力學志須彊得失由來一夢長試問邯鄲歌枕
客人間幾度熟黃梁

別西齋諸友

浮雲如積酥涼颯勁絃疾溶溶渺天末飄忽易相失
懸弧四方志袍繫非予匹平生結歡久始願膠投漆
別離傷素懷此身任萍迹

和鄭商老下第

雨餘新惹一番愁輾轉衾寒客思悠獻璞又添今日
恨登科空負昔人羞林泉水石君先到京國風塵我
尚留莫爲浮名苦憔悴前春行釣巨鰲頭

雨寒

天幕陰雲積蕭蕭雨正霑泥污關市寂水入御溝深
破屋寒侵骨哀絃凍絕音更愁風力健瘦怯不能禁

穎昌西湖泛舟

游賈丞相曲水園

扁舟乘興謾追尋路轉河回入柳陰拂面落花春意
盡避人幽鳥野情深慚無健思供吟筆賴有寒光映
客心日暮倚風歸棹急一鈞新月掛遙岑
春過鶯花無處尋移舟行近古城陰褰衣水上收殘
片傾耳枝間覓好音山隔曲堤迷遠近魚跳文藻亂
浮沉飄然似得江湖趣陡起歸與萬里心

送席二

伊川壻

摳衣丈席想多聞高節應能與俗分不用卑飛入幽
谷定知喬木在青雲

寄游定夫

在穎昌從明道先生

絳帷燕侍每從容一聽微言萬慮空却愧猶懸三釜
樂未能終此挹清風
蕭條清穎一茅廬魂夢長懷與子俱五里橋西楊柳
路可能鞭馬復來無

歸鴈

天末驚風急江湖夜思長悲鳴愁絕塞接翼冒清霜
澤岸多繒弋雲間乏稻梁茫然栖息地飲啄欲何鄉

感事

世事浮雲薄勞生一夢長散材依櫟社幽意慕濠梁

風激鷹鷂迅霜殘草木黃投閒如有約早晚問耕桑

送丁季深

烟含疎柳綠蒙茸杏腴桃英入眼紅邂逅與君逢臘
雪飄零獨我過春風空愁轉轂音塵遠且寄離懷笑
語中後夜月明人寂寂相思那復一樽同

別游定夫

黽勉吾將仕謀身力已分漆雕慚未信子夏又離羣
慘淡交情重間關道路勤至言宜遠寄孤陋願頻聞

冬至日聞雷

土圭日已南百年生有期新陽潛地脉慘慘羣陰微

尚覺雲氣昏嚴颯弄寒威狂雷與驟雨奔逐如喧擊
百虫誤驚蟄生理亦已虧向晚怒聲息霰雪交餘輝
凌寒山驛孤持盃空自疑

蘄州早起

城頭雷動角聲哀似共行人怨落梅欲報晨炊未
熟喚回殘夢眼驚開霜清暗覺貂裘冷月淡空令邑
犬猜倚杖起看風正慘紫微繚繞俯三台

過關山

牢落關山路年來倦往還長隨流梗泛有愧白雲閑
親遠江天外魂勞夢想間泫然游子淚挹盡復沈澗

歲律行將暮颯風凌九垓山深人寂寞路遠馬虺隤
幽意從誰展愁懷殢酒開衰遲仍惜日投晚獨徘徊

晚泊遇雪

向曉驚風急飄零雪滿垌氣泚雲幕幕天遠月冥冥
寒色終無賴豐年謾寄聲鋪糟吾不慣彊醉復還醒
寒逼歸鴻急悲鳴聲更哀舞風斜翳日帶月暗欺梅
平野光初合陰雲凍不開無聊還殢酒顛倒盡餘盃

偶成

天遠何須問勞生聽若何犁鋤三畝足栖息一枝多
白雪寧堪冒清時只浪過好尋明月影醉舞自婆娑

臨川驛偶成

冉冉朝仍暮蕭條官舍幽閉門二尺雪觸物一虛舟
虫蠹生涯盡萍漂世事浮尚思方技學多病未能休

除夜感懷

臨川驛

歲律已云盡思家日日深二年爲客恨千里倚門心
節物羅樽俎兒童學語音眩然如在目恍惚夢難尋
愛日乖予願親顏長在心遠遊仍換歲華髮想盈簪
永夜誰同席殘盃憶共斟相思空有淚揮洒滿衣襟

臨川道上

風雨離山驛斷橋危欲顛去心奔逸驥行路上青天

鴈序江湖樂雲歸島嶼連悠悠遠征客千里獨茫然

旅舍書事

懶拙乖時尚支離與世殊饋漿驚御寇避席愧陽居
觸事紛難解忘形色易勑不須修混沌機械本來無

臘月見桃花

脂臉輕勻作艷粧未應潔白似梅香天紅不見凌霜
操謾向春前取次芳

酬林志寧

志寧從學河南二程先生

君不見昔時卜年公拆龜食墨漚澗東伊流洛水環
紫宮廣輪千里天地中真人一往不復見鼎湖弓劍

空遺蹤陰陽所交風雨會和氣自古生英雄邇來百
千歲零落多竒窮鳴臯少室崢嶸倚天闕下有回淵
萬仞蟠雙龍蒸雲結雨氣濛濛惟有蒼髯紫領包玄
珠時發光燄凌烟虹成周太平鬱餘策但令洙泗生
清風嗟君妙齡有仙骨乘槎暗與天潢通萬里不一
息去若孤征鴻決開銀河浪分出一派懸秋空願予
山野姿未老心已慵謬從君子游營道術偶同有如
退之與東野自慚青蒿倚長松感君惠然抵山谷開
談冰雪清吾胸高堂黑髮顏如童未須念此心忡忡
幸有山前泉清冷可酌與君啜甘茹草忘春冬

離家作二首

庚申歲作

敗葉辭故枝驚颿送微雨田廬向收穫城中亟完補
游子欲何之道路修且阻俛首謝田父子生厭羈旅
胡鴈依朔風群飛逐南翔游子方北征朔風吹我裳
攬轡望雲間夜色正蒼蒼空羨南歸翼幽懷增感傷

過蘭溪

紛紛朝市競秋毫江上霜風正怒號不問揚濶與彭
浪翩然東下日千艘
百年生計一輕舸照水初驚見二毛但道澄江靜如
練那知風雨作波濤

風帆斜颭漾清漪驚起沙鷗掠水飛寄語從今莫相
訝我心隨處自忘機

夜雨

似聞疎雨打蓬聲枕上悠揚夢半醒明日覺來渾不
記隔船相語過前汀

合江亭晚眺

倚杖釣簾兩水間晴光飛影上雕欄帆催畫鷁搏風
去雲吐銛峰作劍攢平野烟浮迷遠目晚溪潮漲失
前灘騎鯨一往扶桑近休問人間行路難

重經烏石鋪

夾屋青松翠藹中去年經此亦匆匆重來烏石岡頭
路依舊松聲帶曉風

嚴陵釣臺

漢網久陵遲國柄授權室中興得英主威明戒前失
三公經邦國吏事困精覈功臣欲圖全猶不任以職
矧茲故人分義等天倫戚卓哉子陵心秉哲固前識
投身秦名爵豈但枉尋尺萬鍾雖云富樊雉非予匹
石瀨清且泚蒼崖聳而直揭竿事幽尋釣水鮮可食
羊裘與冬溫衮繡未云益三旌屠羊肆義不在吾易
用舍各有趣高風亘今昔

過清溪渡

天濶江銜雨冥冥上客衣潭清魚可數沙晚鴈爭飛
川谷留雲氣鶉鴝傍釣磯飄零滄海客傲倒一帆歸

過七里灘

拂雲高鴈倚風搏下視平湖萬里寬搔首扁舟又東
去錢塘江上看波瀾

扁舟東下幾時還一席飛帆插羽翰回首嚴陵臺上
月清風千古逼人寒

登桐君祠堂

昔有隱者結廬於此人問其姓指桐樹示之故號桐君

霜染溪楓葉葉丹翠鱗浮動汐波閑盤盤路轉千峰

表冉冉雲扶兩腋間掠水輕鷗晴自戲凌風飛鴈暮
爭還結廬姓字無人會靜對庭陰一解顏

翠崖千尺峙雲高樓殿翬飛壓巨濤檻外回峯自連

著一作潮去潮來山愈靜祇應潭下有靈鼈

梭山候潮

向晚牛羊沙岸歸落帆烟浦候潮時誰言江上須忠
信潮信于今自失期

晚泊園頭

水光天影湛清淵澤岸沙汀斷復聯江借晚風翻白
浪山銜斜日隔青烟喧林鳥散穿雲去架網人間枕

柁眠獨倚蓬窓靜無語微吟擁鼻不成篇

過錢塘江迎潮

銀潢翻空際天白鯤怒鵬騫海波擊湧雲噫氣聲怒
號萬馬馳車隨霹靂低昂上下如桔槔頃刻性命輕
鴻毛賫囊負笈有夷路一日何事常千艘因思羊腸
盤九坂攀援蜀道愁猿猱人生觸處有萬險豈必此
地多風濤願言夷險不須問莫負對酒持霜螯

江上

寒雲冥幕結秋陰月淡霜娥冷不禁更祝江波休蕩
漾莫令清影碎浮金

泛江至土坊

萬頃江湖遠孤乘一葉船鴈飛雲外字蓬掩水中天
波靜櫓音息風微帆影偏回環聊注目浩蕩接青烟

過金山

環望荆吳拆清江日夜流飛騰潮汐浪漂泊利名舟
山湧鼉蟠出樓噓蜃氣浮僧窓千古意出沒看輕漚
淮上獨酌

廉纖曉雨洗輕塵天淡雲浮夜色新賴有麴生風味
好不須邀月作三人

土屋

土屋枕荒陂周回僅容席環堵異營窟猶遺古風質
功雖勞版築身自有餘力依戶鑿圓竇寒光度如璧
夏開迎溫風冬瑾可栖息胡爲棟宇麗但免風雨阨
安居自寬暇見者徒逼久寄言隣舍翁各自適汝適
慎勿慕華屋澆漓非至德

徐郎廟

古廟靈場枕碧巔松楸依約鎖風烟羽毛一去無消
息墮落人間幾百年

秋日有懷寄從弟表民

丁憂伯父

羈旅吾方困哀思汝正煩望雲愁鴈序回首憶鴛原

北園蔬還盛東軒菊想繁飄零不相見沾灑獨忘言
久不得家書

歛彼晨風飛日暮歸鬱林游子尚何得但寄千里心
庭闈斑白親憶念我亦深云何彼無耗徒役夢寐尋
有如在空谷歲久想足音竹篇一行書貴可抵萬金
踟躕步前庭復坐口欲瘖淚墮不自知但覺盈衣襟
人生本無待豈受外物侵歸當卧牛衣竹籜橫荆簪

觀獵

貂裘白馬誰家子擁戟弦弧囊勁矢寒身欲與鳥爭
飛觸處塵埃雲四起長繩驅逐狐兔驚騎鷹掣臂流

雙睛飛揚雲間電光閃旋復草際無遺生驚腸久厭
鮮肥餌顧盼方能伺人意但矜鼎俎有餘甘貪饕誰
憐殄生類安得淑氣回嚴秋徐令困拙同鳴鳩林間
百鳥恣孳乳雖欲擊搏知無由

遣懷

君子雖自嚴至潔宜若汙昭昭揭日月所向將蝟如
天地一穿中逼反身亦孤游世在虛已浩蕩與時俱
靈府有天游環中真道樞

枕上

小智好自私小德常自足自私開人賊自足心有目

瑕瑜不相掩君子比良玉默默枕上思戒之在深篤

寄范正甫

時討西夏

羈窮莫厭如牢圈從古功名出屠販男兒不負懸弧
心馬革裹尸猶足願君不見淮陰寄食飢貧叟一作竊瓜

寄食淮陰叟

胥下英風亦何有逢時吐氣雷電奔金印纍

纍大於斗玉門晝夜羽檄驚睥睨欲塹天都城叩關
虎士鬱餘怒科頭奮戟如鷗鷹君從壯年蘊竒策未
宜縮首歲柴荆昔人投筆真豪英慨然萬里終成名
南山白額雖欲老百獸遭之猶裂腦

元豐壬戌歲暮書事

閩陬地力盡種藝被山谷涵濡一雨潤鬱鬱原野綠
春風忽云徂舒景變炎燠涼颯動地軸擘歛何神速
坐愁林巒空俯視萬木禿凝霜借風力摧折到松竹
嗟予閉門人感此亦愁蹙幽庭有萱草采采不盈掬
如聞糟牀注取醉須百斛沉酣樂時運天關不須觸
萬物一芻狗蒼蒼自高目

龜山先生集卷第一

龜山先生集卷第二

詩二

歲春峽六詠并序

國華先生得幽谷於劍水之東去其所居僅一里餘
負山之巔闢地西向爲堂名曰詠歸堂之下有亭曰
老圃亭之前有跡穿數畦其南北有二茅亭南植梅
數株名曰暗香北種紫竹數竿名曰虚心又其南有
一石竇其下可容數人名曰容照巖合而名之曰歲
春峽

詠歸堂

結廬東山阿屹然俯全閩下有黃龍淵浮光抱層雲
彼美谷口翁杖策來往頻明月自爲友顧影相爲隣
擷芷佩芳蘭不與麋鹿群虛堂發輝素黃卷日相親
采薇老晨羹弋鳧俯清樽曝日負岩竇爲童浴溪濱
微吟曳雙屐踏破青苔紋歸與自樂只此意將誰論
點狂聖所與聊欲繼餘芬

老圃亭

昔君居隱鱗投竿拂珊瑚國華故居有隱鱗洞前有釣臺今來寓
谷口結亭事春鋤亭下十餘畦蔚蔚富嘉蔬野果銜
朱槩蔓實垂青桴籬根有蹲鴟晨炊勝彫胡豈惟充

君腹隣里亦厭餘疏泉動地脉硤确成膏腴諒彼漢
陰人假修匪吾徒避俗柴桑翁不復嘆荒蕪卷懷經
綸手治平此一畝居知子非隱淪聊以寓壯圖人生
出處分禮義安可踰茲謀異樊須甘事小人儒

暗香亭

謾愁青女妬新裝已有風傳處處香試問隱鱗溪上
客欲將春色若爲藏

虛心亭

山橫鼇背碧嶺屹亭對浮筠縹緲間拾遺記蓬萊山有浮筠之幹葉
青蕭散誰爲三徑侶祇應長共白雲閑

容昭巖

清時投迹在欽峯一穴晴光破晚陰刺草未容忘魏
關故應長有子牟心

藏春峽

山街幽徑碧如環一壑風烟自往還不似武陵流出
水殘紅那得到人間

題贈吳國華釣臺

國華自作記
不取嚴陵

君不見釣璜溪上白髮翁一竿西去追冥鴻田車同
載非羆熊鷹揚烈飛如飄風又不見羊裘石瀨垂綸
叟爽槩凌天動星斗萬乘故人親訪求卧對鸞輿忍

回首聖賢遇合自有時潔身亂倫非所知高風寥寥
古已往較然得失知者誰君有釣臺臨橘水橘溪不
與桐溪比妝身欲躡渭老蹤笑撫長髯照清泚澄潭
夜月秋光浮撇波短艇公汀洲長繩巨石不能繫飛
帆片席歸蓬丘巨釣沉餌牽九牛一釣直掣金鰲頭
脩鱗擺鬣浪山起雲鵬飛翻忽千里跨雲憑翼上青
冥一點孤光刷箕尾

綠陰亭上

吳先生家

沙邊幽鳥傍清漪瀧下漁船逐浪歸身在輞川圖畫
裡晴空惟欠雪花飛

含雲晚歸寄真師

每扣禪關即晚歸，塵中回首萬緣非。
不愁幻翳迷心地，且聽潮音振祖衣。
歸路往來無別徑，夜光清徹有餘輝。
虎溪舊社知重約，陶令如今已息機。

含雲寺書事六絕句

獸駭禽鳴齋廚中，難將此意問鴻蒙。
縈回小徑蒼苔滑，杖屨從今恐不通。

北山山下一漁翁，形解心凝骨已融。
支枕睡餘人寂寂，一軒明月滿窓風。

山前咫尺市朝賒，垣屋蕭條似隱家。
過客不須攜鼓

吹野塘終日有鳴蛙

夾屋青松長數圍，午風搖影舞僛僛。
幽禽巢底鳴相

應時引曳一作殘聲過別枝

竹間幽徑草成圍，藜杖穿雲翠滿衣。
石上坐忘驚覺

晚山前明月伴人歸

蝶夢輕揚一室空，夢回誰識此身同。
窓前月冷松陰碎，一枕溪聲半夜風。

游玉華洞

蒼藤秀木遶空庭，疊石層巒擁畫屏。
混沌鑿開幽竅遠，巨靈分破兩峯青。
雲蔽野色春長在，風入衣襟酒

易醒採玉遺蹤無處問擬投簪級學仙經

久旱

農郊阡陌起黃塵望斷天涯絕點雲踈懶無情訟風
伯幽窓時讀退之文

冬曉

着瓦霜華冷暝空曉霧均氣昏難見日風過易生塵
洗硯水紋破憑爐火色春莫嫌寒尚薄雨雪更愁人

次韻思睿見寄

聖賢千古愧難攀力學方憂敢自閑顧我久拋聲迹
外慚君猶掛齒牙間平生拙計心長在解帶高風志

未還捧檄于今非得已謾勞魂夢遶溪山

次韻蔡武子書懷

放形鋤色恐成光斲聖能令鼻不傷自信放魚真得
計却憐挾策亦亡羊刃投有間多餘地語到無言輒
自忘擾擾世紛何足問松窓終日獨徬徨

感懷寄鄉友

時在虔州

漫浪人間已十年簿書擾擾日羈纏朱公謾有千金
壁季子初無二頃田籬下蹲鴟餘晚實雲根紫鼈奮
新拳淹留寸祿空回首一望鄉關一悵然

病中作

通衢隔轍斷經過門巷空無雀可羅驅去兒童卧虛室蕭然惟一病維摩

送虔守楚大人

元祐戊辰

象緯辰心次雄都水濁時徑天浮瑞彩驚代出英姿
厚德千金璧虛懷萬頃陂霜蹄來漢苑雲翮上天池
籍籍才猷美皇皇使節馳飛書騰衆吻橫穿實通達
剖竹輦流遠還車蜀道熾除成都憲以臺秦庭徒被
指趙璧本無玼黃霸初勤細裴公可範規惠流三郡
俗名掩四賢祠大厦資梁棟承祧賴鼎彝會須紆袞
繡寧久駐旌麾畫舫行空挽甘棠去益思烟波迎棹

急江柳拂墻低賤士行藏拙參軍秩序卑生涯惟蠹
簡事業付毛錐懶愼文園病伶仃曼倩飢自甘同跛
鼈未忍舍靈龜朽質難雕繪餘生辱品題寒荻回暖
律陰壑得晴曦終愧麈頭賤難酬國士知兩行淵客
淚感激自沾頤

吳子正招飲時權酒局不赴作詩戲之

寒爐火冷浮青烟勁風刮面如戈鋌凝陰不動天欲
雪竟日兀兀成拘攣廣文才名四十年天寒坐客猶
無羶參軍官小技能薄寂寞冷坐誠宜然忘形杜老
偶相覓傳呼歌舞開華筵嗟予簡書固可畏不得對

飲簷花前謾有糟漿逆人鼻汝陽口角空流涎可能
更似蘇司業只與時時送酒錢

贈別蔡武子被誣

得釋赴泉州錄參

君不見馬伏波後車薏苡珠璣多又不見章臺奏壁
非有疵相如謬使秦人疑匡章不孝通國非世無孟
子知者誰惜君高材兼衆美完德從來速招毀含沙
怒欲陰中之剛引涇流汙清泚輕雲卷盡天日明容
光竅穴無潛形刮磨玉瑩冰雪凝楚人謾費塗丹青
齊廷有鳥久不鳴會須一舉天衢亨北冥歛起風雷
驚修鱗鼓鬣隨波輕不須回首顧潛鯨好乘扶搖九

萬里奮迅六翮飛南冥

贈致政楊孟堅宣德

孟堅歷三世不改官而諸子各有第宅故以楊陸爲比

子雲論薦有王音

孟堅屢爲達官所薦

陸賈年來老境侵自守

一官歷三世退令諸子分千金平生器業成幽夢白

首功名負壯心賴有新詩輕萬戶未須投綬嘆堙沉

廣文官冷竟誰憐空負才名四十年

孟堅及第蕭散已四十年

欲尋濠上侶飛揚還

一作

作酒中仙龍章繡紱榮何

在鶴氅綸巾靜自便遙憶瀨溪風物好勝游應不愧

斜川

春波亭上

城頭飛蓋映朝暉向晚游人興未移安得魯陽酣戰
手爲留羲馭更遲遲

藍田溪上

夾籬桃李趁溪斜淺淺清流映落花欲問武陵源上
路度雲穿石認胡麻

荷花

照眼紅雲闔晚霞童童青蓋半傾斜會須直跨二千
仞移取峰頭十丈花

寄題環翠樓

記云唐君作此樓以奉親

方壺七萬神鼇連瓊臺縹緲居靈仙鯨翻海運成桑

田異境誰使夔娥遷銛峰四面蒼圭圓巨靈巧以青
瑤鐫揉風洗雨淨娟娟脩眉浮空秀爭妍清溪回旋
瀉幽泉下有澄瀾湛洄淵繡楣雕欄欲飛翔凌切漢
道摩星躔恍如直跨瀕彌巔瑠璃凝光園四天喜君
妙齡謝世喧萱堂慈顏白盈顛兒童牽衣戲踰蹊優
哉此樂誰與先嗟予昔以三釜懸投身世網百慮煎
今乎老矣誠可憐狙猿何用簪纓纏子雲終須守一
廛誅茅結屋纔數椽薜衣雜佩紉蘭荃手披白蟬玩
青編春暉不報常歛然雖有至樂安能全

勉懷

紛紛於我未忘情
踈懶多應拾怨憎
便好世間師柳惠
不須巖下問孫登

宜春溪上

斜斜踈柳照清漪
籍籍殘紅自滿蹊
刺眼藤梢牽不斷
欲尋流水路還迷

宜春道上

艷杏天桃日日稀
空餘淑氣尚遲遲
誰人爲作留春計
莫放風花自在飛

過豐城

清江渺渺綠浮天
博物無人繼昔賢
應有斗間靈氣

在誰能更與斲龍泉

瀏陽五詠

渭水

洄淵浩蕩白鷗飛
老懶時來坐釣磯
岸幘行吟聊自適
不應憔悴似湘縲

歸鴻閣

簾捲晴空獨倚欄
冥鴻點點有無間
秋風注目無人會
時與白雲相對閑

飛鷄亭

芙蓉雕盡蕙蘭芳
湖水多秋蘭杖屨翛然一漫郎
鳧鶴短

長寧復無一作問但知鵬鷄兩相忘

相公臺

柔條踈蔓綠交加烟鎖雲涵去路賒繡紱貂纓無處
問空餘鷄犬兩三家

洞陽孫思邈
修真所

聖童去後水雲閑陳迹難尋草莽間獨有微言傳野
史洞天寂寂一作從此在入寰

寄湘鄉令張世賢

身游羿殼偶相逢安得初終若駮蚤道學未容窺閫
奧吏師應許叩隣封蕭條此意君誰問落托微官我

更慵盧白回旋真戲事傍觀無用氣填胸

縣齋書事四首

朱顏凋盡鬢鬢繁世路低回老益慙偶影獨游聊自
適談書不輟竟何堪神爐默默金徒踊一作天君默
默情何在

蝻蛭紛紛夢正酣誤把此身撻世網自纏微纆信如
蚕

簿書接老豈身謀朱墨紛紛晚即休平世功名歸稷

禹一瓢吾欲慕巢由

一去人間二十年空餘飛雪上華顛清時最有求田

樂未愧陳登榻上眠

身名於我兩悠悠形影相忘懶贈酬擬把一竿滄海
去漫然清世一虛舟一作不應沙上有鷺鷥

次韻錢帳計

駸駸義馭定難羈過隙跳丸日夜馳但見光陰如掣
電却尋稽覽已當暮飛黃汗血宜千里秋鷲乘風此
一時芝草鳳凰真美瑞清名應有退之知

和潭倅張朝請行縣言懷

夾道旌麾動陰霾萬里開霜迎威令肅春逐馬蹄來
幽壑光初滿寒荻暖自回仰窺嵩華質曾未施纖埃
又用前韻和早梅二首

楚國春歸早寒梅處處開月和清艷冷天與靚粧來
東閣詩魂動南枝歲律回蕭然冰雪態無處覓輕埃
星馭經行處梅花恣已開只疑春信早先擁使旌來
嫩萼紅初破寒柯綠未回凌霜半含月皎皎絕纖埃

和張倅行縣

江浮疊嶽弄清輝雲外冥鴻江上歸擊目自多幽興
在揮毫時見彩棧飛應愁零雨侵星駕好爲援戈却
晚暉帝室正須調鼎鶴動移寄語不須譏

假山

衡湘側南二千里清淑之氣常蛇蟠丹砂玉食氣所

感融結萬狀非磨鐫窮源荒溪異岱岳不逢禹績終
棄捐苔封土蝕誰復問嶙峋僵卧當市廛龜山老叟
見之喜鳩徒輦置羅前軒岩堯孤峰露仙掌如掌一石
屹若泰華青摩天傾崖斷壑坐中見葱蒨似欲生雲
烟初疑祖龍未死日浮梁擬跨咸池淵神號鬼怒驅
不前捶擊剉磷成枿圈又疑巨人出龍伯揭竿來自
崑崙巔連齧合負雲濤翻蓬壺簸蕩留平川繫予竟
日倚欄檻矯首便欲追靈仙尻輪神馬自足駕已覺
兩腋風冷然瓊臺浮游與世隔醉傲笑拊洪崖肩山
間草木即靈餌含英茹實資長年悠悠廣息變今古

坐看溟渤成桑田

檢田

尋崙上層崗隨衝出高原烟火一里餘鷄犬遙相聞
瘠壤僅容席訟牒徒紛綸齊魏兩蝸角况復三家村
舉世競毫末薄俗寧足論吾衰過元亮欲辨已忘言

縣齋書事寄張世賢

朝衙群吏集戢戢同隊魚暮衙群吏散翩翩若驚鳧
歸來坐虛室開編對璫璣啟戶閒無人清風入吾廬
持盃邀明月大爵時與俱跣躩步松陰對影聊相娛
嗟予懶植久濶畧與世踈故人隔清湘懷抱何由舒

爲問魯山翁此意今何如

公幹游大光示犀老

山橫杳靄有無中
疊觀層臺一梵宮
萬軸琅函方一作聊
杜口數聲啼鳥正
談空溪雲抱影侵
行屐香篆飛烟襲
晚風薄宦羈人如
接榴自慙來往苦
忽忽

王簿清輝亭

儻染烟螺拂檻低
抱城流水綠逶迤
澄瀾碎影搖青鏡
斜日疏峰隱半規
坐上盈樽無俗客
壁間照夜有新詩
登臨已動忘歸興
况復清談足解頤

醴陵丁君洋洋亭

依蒲泳藻兩相忘
宛有江湖氣味長
凭檻翛然真得計
祇應幽興在濠梁

寄長沙簿孫昭遠

時以不催積欠被劾

陽城衰晚拙催科
闔寢空慙罪已多
祭竈請隣君自適
載醪祛惑我誰過
猗猗庭有蘭堪佩
寂寂門無雀可羅
歸去行尋溪上侶
爲按纓紱換漁蓑

龜山先生集卷第二

龜山先生集卷第三

詩三

送蔡安禮

眷言與君違寤寐念往昔結歡自童稚分比膠投漆
乖離成參商出沒俱齊汨義和鞭日御過眼飛鳥疾
五載一相逢俯仰如昨日論情方繾綣念子又何適
行矣不可留惆恍心若失人生惟所遇行止或使尼
況復各宦游聚散何可一嚶嚶黃鳥聲上下求其匹
俛首聽遺音飄零淚橫臆

席上別蔡安禮

予方赴調安禮赴博羅任

故里相看眼暫明一尊聊此話平生杜陵蚤被微官
縛元亮今爲世網櫻長路關山吾北去春風梅嶺子
南征結隣廬一作莫負當時約早晚滄浪共濯纓

次韻安禮見寄

末俗相看老尚新交游千里更誰親蕭條身世聊安
分迂濶行藏懶徇人宦路競羞關柝吏勞生誰息利
名身我慙抱甕無機械幽興惟思水石濱

安禮以宏詞見勉因成二篇奉寄

吏部文章世所珍終慙無補費精神浮名膚外增餘
贅薄宦戈頭寄此身養志吾方同邴曼談書誰復問

山賓自憐坐頃三遺矢衰晚那能用楚人

萬鍾身外一牛毛斗祿紛紛謾自勞窮酒寧爲獯獯
笑未容仰首試鳴號

安西聞捷三首

呂吉甫得節

鷹揚塞外得非熊萬里金城一箭通玉帳投壺隨燕
豆坐看飛將縛驍戎

將軍新擁節旄閑紫塞雲浮豹尾斑白首邊城休悵
望馬蹄未出玉門關

雅歌不待來天馬謝質今應閉玉門早勒勲名上葵
鼎放回春色滿乾坤

感事三首

邊檄無虞日王師討弗庭收功許廟筭行政毒生靈
川谷旌麾暗風塵戰血腥寂寥歸馬日日斷華陽垆
虎士冰河側日聞刁斗驚氣吞沙漠盡岷蕩賊巢傾
關塞長年戍邊城幾日清太平陳朽富一旅百夫耕
桑麻腴地想榛荆騎士西來劍戟腥藜藿陋儒心更
鄙但思干羽舞虞庭

冬寒兩齒忽覺動搖因成書懷

末年三十髮先彫歲晚俄驚兩齒搖都爲踈慵成計
拙直緣衰病覺形焦連經宿雨重裘冷旋煮藜羹野

興饒擺脫塵樊猶未得不堪回首問漁樵

書懷

駸駸塵土久方還直道謀身力愈難靖節每嗟嬰世
網漫郎何意出人間風驚駭浪潛鱗伏竹隱灣磯翠
羽閑好去杖藜穿蠟屐伴雲隨月弄潺湲

泗上

聞將閉汴口

淮口平沙漲檣烏向日斜微雲變蒼狗輕浪感浮花
風勁回飛鴈林喧集暝鴉河流應未閉遲我到京華
鬢蓬凋欲盡岸憤任欹斜瘦怯重裘重慵看細字花
凍雲穿曉日晴樹遠飛鴉老大驚遲暮飄零惜歲華

聞道河流閉逢人每問津天高雲幕幕風細水鱗鱗
未種江陵橘空思千里尊且邀明月伴相對解綸巾

汴上開開月堤

天上行雲曳白衣半銜晴日在林扉盤花落鴈鷺還
起啄食飢鳥趁不飛榆莢青錢飄已盡月堤流水漉
相圍征途處處塵隨眼多病長年與世違

出京

己卯歲九月

旅泊驚秋意塵沙變客衣明星爛河漢殘月暗簾帷
風柳斜斜轉雲帆片片飛窮愁添別病衰晚意多違

出尉氏

隔林殘雪弄輕風日射晴光玉縷紅桃杏渾如梅欲
綻直疑身在故園中

陳留書事

烏檣風纜欲飛翾拍岸驚濤挽不前曲浦漲沙仍積
凍疎林斜日自生烟崎嶇道路真堪笑放浪江湖已
判年一枕晝眠無好夢空慙邊老腹便便

予自長沙還植蘭竹於東西軒調官京師逾
年而歸蘭竹皆衰悴感而成詩己卯

柴桑衰晚愛吾廬三徑歸來手自鋤但得叔卿長飽
飯不妨孝若老談書蘭因採佩枝先瘁竹爲凌霜葉

自疎留骨廟堂寧曳尾魯門無用祀爰居

吉溪早起

短日催征轡聽鷄踏曉霜遠山頻入望薄酒謾搜腸
湘浦蓴絲滑吳松鱸縷長何時一踈放把釣卧滄浪

漢坂舟行

曲岸通幽徑踈籬映竹斜塢深葳吠犬林薄露人家
石瀨魚偏美隣村酒易賒祇應雲水富自是一生涯

秋晚偶成二首

纖纖晚雨洗秋容庭樹蕭然策策風萬籟自鳴群物
外四時長在不言中坐臨流水襟懷冷卧對浮雲世

慮空寂寞一屢吾自適客朝從更議楊雄

風飄浙瀝鬧諸隣却掃衡門溷世塵天氣清明秋意
態夜光浮動月精神流年漸覺侵雙鬢生理從來付
大鈞臨水便同濠濮趣翛然魚鳥自親人

感事

權門車馬日紛紛寂寞多應笑子雲玄白定知非世
尚解朝那復彊云云

晚雨

斷霞明滅天日黦雨意晴暉爭好醜浮雲冉冉無定
姿白衣忽變如蒼狗語見老杜詩悲風激烈河漢翻雨脚

如麻飛霰寒山深氣腥豺虎亂乾坤四合誰云寬將
溪溪上野客懶成癖怯寒手攣面如墨把盃強吞僵
立歌閉門獨愁天已黑

隱几

上天不隕霜萬木正鮮澤青蒿與長松各挺歲寒節
朔風吹沙寒高嶺凍積雪萬木已摧落長松獨青潔
人生無艱危君子竟何別隱几試澄思行藏易差轍

入山行

蒼崖峭立青天涯古徑蕪沒沿清溪深林四合晝亦
暝寂寂惟有猿猿啼野人心形灰死如槁木山禽見

之猶驚飛因嗟太古不可復我無機械胡相疑

題愚齋

溪東黃室

結廬依林丘回峰爭盤紆下闕清池淵憑軒數游魚
飛閣出雲表浮烟襲簪裾中有傲世士脫畧自謂愚
高義輕簞金貽謀有詩書青編富充宇散秩羅瓊瑤
鱗鱗壁間題一一露珊瑚嗟予久昏塞荒蹊少耘鋤
昌黎已隔世將焉問夷塗道逢北山公荷鍾時與俱
皎皎河曲叟朋非一作齊共歔歔高齋一來游豁然心
神舒籬東有餘址誰能雍榛蕪結茅可容席一瓢來
此居寄謝陶彭澤何必愛吾廬

贈醫者鄧獻臣

天地一氣猶治甄埏埴萬彙隨方圓神形九藏通九
野八風中物如戈鋌天元玉冊有遺義探索始自三
皇前桑君越人不世出鑿石鍼灸誰能傳賤工增餘
損不足往往橫天殘天年羨君妙齡踵其學至理隱
蹟常精研聞陰得陽以神遇反視方術猶蹄筌道隅
萍蘆即為餌車上已有長蛇懸嗟予羸荼苦多病維
摩丈室方蕭然願君速已天下疾為予一洗沉痾痊
游武夷是日泛小舟至雞巢岩還游冲佑觀
函關崎嶇走秦鹿天下並逐爭群雄快雲翻空鼇足

折黔黎窟伏如寒蛩武夷山深水清泚避世猶有高

人蹤龍泓東注海波涌嶺有投龍池世傳與海通玉女翠擁秋雲

鬆玉女赤霄真骨寫虛壁通泉凡筆慙非工媿玉峯前有畫

一鶴藏舟浮梁跨絕壑山間有小橋橋西有一小舟皆人跡不可到隱見似

與天潢通當時鷄犬不復見窠巖依舊烟霞籠我來

秋抄月既望尚有幽菊埋榛叢天容洗淨雨新霽雲

幕四卷清無風掀蓬進棹窮異境注目想見流殘紅

回船杖屨躡幽徑松竹窈窕環琳宮翠琬溫辭耀華

袞褒詔有石刻金榜大字纏蛟龍自憐病骨掛塵網幔亭

高會何由逢解衣歸卧玉鎖碎仰看明月穿疎蓬

童氏必大亭

生前作此亭

超遙武夷翁霞衣爛朝日作亭依雲根望壙茲焉息
仙游去不返孤丘已陳迹身雖隸編齊貽謀有遺則
慶流終必大名亭以為識伊昔晉公堂三槐手親植
扶踈滿庭陰貂蟬映圭璧默視天人際召應齊呂律
閭門容軒車茲理固可必終見童氏甲鳴珂聲赫奕
和李倅游武夷

濃淡烟鬟半雨

一作雨

晴溪光初借晚霞明鼇頭湧出

三峰秀

三層峯

天漢融成一鑑清

魏玉峯頂

粉社

有誰蔽舊謀賓雲無處問遺聲慢亭寂寞仙何在勾

漏丹砂早晚成

黃彥昭時思閣

前有連理檜

孤丘鎖千岑層閣跨雲起永懷霜露思時未薦醪醴
欽宗貴收族螫螫神亦喜故令傲霜根駢枝復連理
黃侯渥注種一躍不容擬慶源如歸墟萬壑自奔止
終見君子鄉乃是鳴珂里

綠漪軒

開池傍清軒環除種蘭芷虛明淡星漢踈影薦鳧履
君乎試憑軒鑑此庭下水盪風生微瀾風定還泚泚
悠然真得趣吉祥來止止

迂踈堂

終南有捷徑屈蠖終當伸君獨耻不蹈安得與世親
結廬寄人寰獨往寧問津形影廢酌贈相忘誰與隣
寄謝漢陰叟抱甕良非真

鄱陽湖觀打魚小龍廟在湖上崇寧壬午

秋高水初落鱗介滿沙脊浩如太倉粟寧復數以粒
紛紛漁舟子疑若俛可拾橫湖沉密網脫漏百無十
虫鰕雜魴鯉駢首吐微濕小人利口實刁杌汙鱗鬣
鯤鯨亦狼狽風雨移窟宅玉淵有神祠變化在嘘吸
胡寧飽羶香忍視萬魚急幽潛不足恃感嘆百憂集

寄謝漆園吏於計未為得

南康值雨

廬山即龍菴有劉道人自云百餘
歲碧眼不粒食惟食松飲水每客
至必先知之欲往見
之不果故并記之

平沙漲雪清江瀆水花照日紅生鱗軒然五老出城
表雕玉萬仞窺長身雲巾星弁覆華頂飛泉漱瀑垂
天紳平生未識廬山面碧巘橫雲望中見江頭一夜
雨行天奔浪號風作悲健朝來淤泥沒牛馬咫尺坐
論千里遠芒鞋拄杖掛塵屋神馬尻輪颯飛轉卧龍
菴前碧眼翁日飲山渌飡溪松神融氣合八荒外此
心炯炯宜先通未須移勒却俗駕會應一洗塵凡空

寄言歸侍壺丘子他日來游當御風

白公草堂

爐峰裊裊曉烟輕雲入屏幃一枕清高興自應無世
累獨於妾馬未忘情

過廬山遇雨

江風吹雨逐人來行過山前首重回絕頂隔雲看不
見石稜崖角獨崔嵬

題諒長老壁

維摩病士意超然邊腹便便但晝眠共說平時忙底
事烹茶煮藥過殘年

東林道上閒步二首

籃輿塵土滿簪纓步入深雲澗谷清漱石枕流非我
事謾臨溪側聽泉聲

懸崖絕磴碧嶺屹杖屨行尋一水間藉草弄流塵土
遠似聞車馬隔人寰

過東林三首

寂寞蓮塘七百年秋溪雲庭月兩悠悠我來欲問林間
趣萬疊松聲自唱酬

百年陳迹水溶溶尚憶高人寄此中晉代衣冠誰復
在虎溪長有白蓮風

碧眼厖眉老比丘雲根高卧語難酌蕭然文室無人
問一炷爐峯頂上浮

江上夜行 赴荆南道

冰壺歛艷接天浮月色雲光寸寸秋
古別離云碧欄之下寸寸秋色
不用乘槎厲東海一江星漢擁行舟

江上晚步 赴荆南詩

鏡潭磨青空璧月浸江渌攬衣弄清泚炯炯月在掬
冷然適我口肝膈貯冰玉流光頃百變一玩不可復
歸來盡餘樽醉卧媚幽獨羲娥偶相憐歲往如破竹
餘生枕中付勿問黃梁熟

過漢江

西極鼇足折東南地維傾衆流競趨下汹汹歸滄溟
誰能跨明河挽此經天行世難乘槎翁此意終冥冥

荊州偶作

鄭公嵇阮流野性本麋鹿平生傲羲皇白首就羈束
天寒客無糧官冷飯不足顧予支離人攘臂受餘粟
江魚尾盈尺飽食勝梁肉荆山富樵蕪文室有餘燠
頑踈愧前哲所得喻往躅談經追時好俯仰負愧忸
流光逝不反愁鬢日改綠世道劫火燃不燼乃良玉
晚交定難恃雲雨手翻覆官居真蘧廬東擔聊託宿

求田意雖鄙此計正宜速歸尋谷口耕勝賣成都卜
坐想帶經鋤倚耒聽布谷

過石首謁縣官回有作 壬午十二月

萬事紛紛醉即休無功可作酒泉侯誰能載取千缸
去且向舟中打拍浮

荊州書事二首

江湖泛泛一虛舟去作人間漫浪游歲晚光陰雲冉冉
舟畏途風雨日浮浮萬鍾信是樊中雉一棹聊同水
上鷗投老菴鹽一作簿書成底事憑誰為種橘千頭
千里瀕江地可毛結廬何必故山椒載醪不過斜川

路飲水誰同陋巷瓢勿問雞虫閒得失但知鵬鷁各
逍遙黃塵滿眼僧窓靜坐對風花意已消

送鄭季常赴太學正 修

驅車出西城眷言與君違北顧臨康衢問子將焉之
赤驥度渥洼終當飲瑤池城都九軌道一躍不可追
浮塵暗荆棘捷徑行多迷長風戰秋林零露沾人衣
青松不改柯期子清霜時

江陵令張景常藏書 萬卷堂

民生結繩初異宇本同體誰令四目翁破肉作瘡痂
龍龜出河洛茲理固天啟張侯瑚璉姿高步軼前軌

買書費千金充屋未云已六經瀆溟渤百家雜源委
中流湧千波舉體惟一水參前有真趣萬古一憑几
毫端吐奇芬溢目麗紈綺微言窺聖域妙意期得髓
默坐筌蹄忘斯文亦糠粃

送向和卿還京

子韶

江湖多秋風倘恍夜不眠念子將不歸起視明星懸
君平翠蚪姿聳身蒼梧淵高步隘八區凌風上青天
妙質蘊荆璞寧須事磨鐫贈言以爲別妄意追前賢
聖言乃常珍含咀真味全奇辭暫時好過眼如飛烟
潔身忌廉剡觸物宜虛船吾方病羸恭市藥還自憐

明日隔長陂相望空惘然

次韻何吉老游金鑾寺

榮名嗟何爲病木自生瘦彭殤一夢覺烏用論久頃
寄身淵明廬條然在人境衛生鄙樊雉放浪任流梗
相忘到形影世累不須屏剡鍼聊自營寧復事干請
負暄有餘燠蓬鬢亂垂頸客來坐無擅誰顧廣文冷
忽聞過吾門冠屨不暇整邀我招提游並轡相與騁
僧關叩禪寂未語心已領並游皆韓徒辭刃淬鋒穎
多聞富如坻吾方捨遺秉顧慙管窺陋未覩豹文炳
謬追俊游後如渴得甘井願從借金篋爲刮眼中眚

鼻端望漫久妙質愧非郢賡酬困詩律恐作杜陵瘠
相攜上層崗出戶畏深窅每虞參也魯頓步輒三省
遲迴月初上雲關掛金餅昏鷓鳴相呼更覺林逾靜
湖光湛星漢渺渺天水永歸蹊暗塵土回首失清景
角聲下譙門歸步怯脩嶺晚市人迹稀青燈耿踈影
金鑿有退之題名故有韓徒之句

向和卿覽余詩見贈次韻奉酬

杜陵頭白長昏昏海圖舊繡冬不溫更遭惡卧布衾
裂盡室受凍憂黎元詩人窮愁自古爾豈若種藝依
青門嗟予老嬾世不用窮巷久雨無高軒虫鳴鳥噪

感時節發不恤緯羞前言殘章斷簡弃不錄自愧潢
潦無根源君胡衮字富褒飾三復妙語將誰論知君
獨負青雲器欲使餓者名長存

龜山先生集卷第四

詩四

送胡康侯使湖南

北溟有潛鱗其廣數千里揚鬣厲東海汎汎等浮蟻
百川競奔注漫不見涯涘寄之天地間大澤曩空耳
胡侯荆山姿妙質久礪砥飛聲動旒冕持節照湘水
功名與時會事道從此始驛驢駕輕車夷路通九軌
朝燕暮騰越快意未爲喜聖門學須彊一簣虧可耻
擴之天地寬於道乃云邇爲士貴弘毅無忘味斯旨

送趙循道赴都講

南陵人

鳳山鬱崔巍下有千頃陂

南陵鳳凰山大峻極不可

攀浮光亘長鬢晦冥滴風雨澄淡含環竒吸呼入君
懷萬態羅心脾吐辭屢金腹煥若星斗垂竭來荆渚
游紅蕖照清漪故宮久零落一酒增余輝惇族貴老
成堯言下丹墀浮駿駕雲帆眷然成化離長裾曳王
門豈比困鹽齏驂騑踏長坂萬里誰能羈

直舍大風書事寄循道

枕書無寐首空搔萬竅噓風正怒號雪意浮空迷遠
日月林樛影見秋毫幽庭所藉惟荒草妙理應須付
濁醪誰念維舟江上客落帆千里壓雲濤

天寧節

祥開若水射瑤光淑氣先春景自長玉陛風閑飛綵
綬獸爐烟暖襲珠囊千秋節賜綵綬珠囊雲間羽鶴
儀仙仗天上蟠桃薦壽觴已見晶輝環帝座定應長
照鼎官傍鼎官傍一星人主壽星也

留別富宣德

富侯荆山姿落落混燕石鑄磨經世故不磷乃天質
軒裳儻來寄寄去寧須戚驂騑走長坂一跌未爲失
秦庭謬瑕疵睨柱終完璧君子有遠懷事道先器識
千鈞等鴻毛始見烏獲力行矣各勉旃他時賴三益

送王充道游三茅廬鼻

荆吾相望各天涯千里柴車庶自隨
解轡定應春盡日及歸宜待鶴來時
三茅中峯每歲八月十七日羣鶴至充道當候見物乃可回
聖賢莫負樽中酒日月長為物外遲
若過匡廬訪真隱卧龍庵下有期頤
卧龍庵有劉道人年百歲壽

和席季成游金鑾寺

朱甍碧瓦照孤城杖履翛然野色清
穀捲水風輕蕩漾珠翻荷雨自虧盈
勝游已覺非人境妙語寧須味玉英
願借金筇聊刮目不容幻翳有纖萌

席太君挽辭二首

配無前古傳家有子賢四靈來薦瑞
一鷲已摩天
高里迷長夜悲笳慘暮烟蕭蕭原上路
猶想駕雲軒
示粹猗蘭秀來嬪洛水濱一窺識公輔
三徙得儒真
盡翠流雲氣松阡卧石麟哀榮今日事
誰復繼前塵

直舍書事

鱗鱗池面水初生萍底青蛙自在鳴
誰使幽庭當鼓吹雨餘時聽作新聲

登峴首阻雨

時自荆南入京

羊公風績幾經秋獨遶龜趺為少留
欲問荆人尋舊事一江清泚自東流

江浮雲影抱層欄雲外青山一水間盡日倚闌看不
足杖藜欲去更回還

江風飛雨上雕欄庭樹蕭蕭景自閒向晚微雲遮不
盡好山渾在有無間

庭前古木已經秋天外行雲暝不收倚杖却尋山下
路一川風雨濕征輶

湘君祠

烏鼠荒庭暮秋花覆短牆蒼梧雲不斷湘水意何長
澤岸蒹葭綠籬根草樹黃蕭蕭竹間淚千古一悲傷

岳陽書事

洞庭水落洲渚出疊翠疏峰遠烟沒重樓百尺歷高
城畫棟沉沉倚天闌湖光上下天水融中以日月分
西東氣凌雲夢吞八九欲與溟渤爭雌雄澄瀾無風
雨新霽一日萬頃磨青銅琉璃夜影貯星漢騎鯨已
在銀潢中湘妃帝子昔何許但有林壑青浮空君山世傳
湘君居此因以得名蒼梧雲深不可見遺恨千古嗟何窮須臾
晦冥忽異色風怒濤翻際天黑乘陵瀨壑走魑魅溇
瀆百恠誰能測忍看舟子玩行險更欲飛帆借風力
安得晴雲萬里開依舊寒光浸虛碧

渚宮觀梅寄康侯

欲驅殘臘變春風只有寒梅作選鋒莫把疎英輕鬪
雪好歲清艷月明中

新湖夜行

平湖淨無瀾天容水中煥浮舟跨雲行冉冉躡星漢
烟昏山光淡桅動林鷗散夜深宿荒陂獨與鴈爲伴

哀鴻

哀鴻常苦飢悲鳴垂其翼朔漠曉霜寒江湖晚烟羃
乾坤一網罟高飛亦何益日暮無與群驚風暗沙磧

寄定夫

憶昨相逢鳳山址駒隙駸駸餘半紀君趨烏府近清

光陸海驚濤漲天起雲帆大舸半摧溺巖岸得全誠
偶爾我時捧檄赴荆渚放浪江湖一浮蟻談書孝先
老無用哺啜糟醕咀糠粃東歸雖復有民社爲米折
腰良可耻市朝紛紛真羿殼朔幹燕弧不容擬投身
中地竟誰免未信棘端能捍矢重樓百尺卧玄德問
舍求田不須鄙早歲結隣初有約齒豁頭童今老矣
築場預想傍田廬負耒耦耕何日始

寄練子安教授

憶昨吾子客上都我獨奔走天南隅各年未壯已多
累誤投世網身攣拘飄零今日偶相值乃復咫尺不

得與子俱人生委質金在爐大冶鼓鑄誰號呼惟愁
跋跋走塵土舊業幾廢成荒蕪惜君高才卓犖與世
畸雄文洒落珠陸離雷驚電赫轉坤軸風號浪擊飛
天池珊瑚抵幹滄海竭騏驎超軼不可羈經綸有道
世莫知櫝中良璧姑自竒君不見扶藜隘巷蓬草居
短褐甕牖桑爲樞擁門軒蓋何所慕藜羹自飽非癯
如又不見楊雄寂寞守太玄弃捐覆瓿真可憐折腰
小吏昔所耻田園須賦歸來篇終當結屋蒼崖巔期
子相與臨清泉投簪解帶謝人世拂塵披蠹親遺編
松皴檜老生青烟雨餘風弄鳴哀絃低回野興有真

意浮名鶴雀過吾前結歡膠漆常連連從游鹿豕終
長年

送陳幾叟南歸 丙戌年

連墻東郭倦追尋高卧毗耶老疾侵自愧屠龍真拙
技謾令吾子費千金

霾風靈雨濕征裾隔雨樓臺半有無南去定逢韓閣
老歸愚當更問夷塗 是時幾叟過四明見了翁

幾年夢想到親幃身逐行雲萬里飛茗水未殊沂上
樂春風無負舞雩歸 初授餘杭

寄題趙貫道後樂亭 亭在沂州新泰縣

叢祠有狐鳴群雛滿東州彬彬齊魯郊不復論軻丘
鼓刀敗繒翁袞袞登公侯風流日凋弊世久俗益偷
昔時戴經人輟耕仍佩牛椎埋晝行盜閭里更相讎
趙子尉平陽始至惟民憂百花爛成圍幽禽哢春柔
問子胡不樂我心殊未休威明揉彊梗驕鷹化爲鳩
買犢解吳鈞束身自鋤耰田廬戶無樞長物弃不收
結亭自樂只開編玩前修誰云酸寒吏憂樂非身謀
乃知君子懷與世異沉浮嗟予一漫叟放浪猶虛舟
舞雩有清風遺迹今在不君乎去此矣欲往將誰儔
寄言春服成尚覲一來游

謝詹司業送酒

鄭公負才名流落四十年高視隘八荒天寒坐無氈
忘形賴司業時與送酒錢嗟予樗櫟材臃腫世所捐
云何附青雲拜賜追前賢開壺對清樽內愧顏醜然
公乎廊廟姿直幹上參天袷服群袞官不虞妬爭妍
驂騑誤一蹶萬里終騰騫朝燕暮刷越駑馬安能先
玉瑩本無瑕寧湏事磨鐫宣室久虛席茲行定詳延
陋儒氣填臆感槩聊自宣辱惠不知報強歌成短篇

春早

雲天暮暮漏微光踈懶惟添睡思長枕上隔籬聞鳥

語半殘春夢更悠揚

春日有懷諸友

憑几無聊晝掩扉
芬芬晴氣減春衣
隔簾相應鶯初語
背日連飛鴈北歸
莫逆交游千里別
遠來音信兩年稀
追尋舊事成幽夢
觸物心行事事非

戲贈詹安世

喜談兵慕耿弇之為人故有虎牙之句

綵舟駐閭門初與子相識
長空翥秋隼爽氣橫八極
摘辭鏤圭章吐論森劔戟
鄧侯不願仕志在書竹帛
長纓係單于落落蘊竒策
氣吞流沙外意無燕然北
虎牙有餘勇戎虜非彊敵
會當朔風勁仗鉞控鳴鏑

老夫慙衰謝見子徒感激
平生謬經綸此意已寥寂
信哉功名會事道古難必
窮通付時命未足爲悅戚
餘生如鼯鼠滿腹微分畢
行矣脫簪纓翛然適吾適
安世乃司業之子年少未受官

出郊

雲根脩蔓綠成陰
風雨園林嬾重尋
春自去來人不問
碧桃朱李付幽禽

望湖樓晚眺

斜日侵簾上玉鈎
簷花飛動錦文浮
湖光寫出千峰秀
天影融成十里秋
翠鷗翻風窺淺水
片雲隨意入

滄洲留連更待東窓月注目晴空獨倚樓

春日五首

春深不見鷓鴣聲百舌時聞自在鳴獨步移牀卧深
屋細看新燕巧經營

薔薇正好結花棚擬爲幽軒作錦屏窮巷寂寥人不
到空歲春色鎖深扃

一番微雨一番晴淡淡一作裝點春容照眼明庭外幽花

自開落飛揚無處覓殘英一作可憐蜂蝶謾多情

清明百鳥轉新聲摧啄幽花折粉英冷坐隔簾呼不

起惜春無計若爲情一作與忘情

雨餘殘日照窓明風弄一作收拾行雲點點輕坐對庭陰

一作獨倚春風人閒寂時聞蛛網掛虫聲

遣興

嵩華千仞立不碍天地寬涇渭清濁流不離海波瀾
人生過眼萬事後記憶細故真童顏

春晚

雲靄浮空一作淡烟半雨晴茅簷未忍掃殘英欲尋春

物飄零盡只有黃鸝一兩聲

浮花浪蕊自紛紛點綴萼苔作繡茵獨有倚欄香未

歇可紉幽佩繫餘春

病中作

南京

此身如幻病何傷
白日無人景自長
寄傲南窓容膝地
時時飛夢一作清夢到羲皇

過簷赫日晝如燔
睡轉庭陰始一反
縱有諸人來問疾
毘耶居士已忘言

寄形一榻日遽然
倚杖支頤髻指天
莫逆過門無子祀
時來鑑井自蹉躓

古椿朝菌已忘年
貧病寧須更問天
右彈不妨隨物化
自求鴉炙自應便

病起

竹風帶雨作秋聲
半睡惟聞鳥雀爭
老病衰殘惟骨立
白頭看鏡不須驚

送富朝奉還關

紹榮字國華

君不見慶曆承平道
如砥馳車八荒同一軌
虜人鴟張怒螳臂
百萬雲屯若封豕
又不見朔方橫流漲
天起腐麥蛾飛木生耳
扶攜道路雜老幼
操瓢溝中半爲鬼
關河日夜刀斗驚
嫚書乘駟來渝平
兵間持節得英傑
談笑坐使羈長纓
青社環城萬區屋
發廩分曹具
饘粥飢羸枯頰陡
生光叢塚不聞新
鬼哭滅孫有後天
匪親閭門容車何
足論竭來淮上見
猶子雄

姿苑有典刑存驂騑已度渥洼水朝燕暮越應千里
行看玉勒駕鑾輿濯足瑤池從此始

次韻晁以道

庚寅年出京

誰能載酒尋元亮共寄一作無何作醉鄉便好散身
事農圃不須驚世露文章壺中日月春長在塞上烟
塵客自忙千里同風無遠近未分秦隴與瀟湘

和陳瑩中了齋自警六絕

瑩中詩附

畫前有易方知易曆上求玄恐未玄白首紛如成底
事蠹魚徒自老青編

八菜同宇混車書一視那知更有渠憑軾自應由砥

道徑蹊無處問歸愚

愚作歟

行箴須信執中難時措應容道屢遷一目全牛無肯
綮駭然投刃用方安

造次欲安嗟孰是參前無物若爲書蕭條此意人誰
問興廢由來命也歟

聖門事業學須彊俚耳從來笑折楊詭遇得禽非我
事但知無有是吾鄉

盈科日進幾時休到海方能止衆流只恐達多狂未
歇坐馳還愛鏡中頭

了齋自警

了翁

本無一字堯夫易八十一篇揚子玄今古是非那復
辨仲尼猶不廢韋編

文章難寫伏羲書字外成篇始見渠賜也能分可不
可一瓢居士只如愚

過時不易使爲難執處那知是變遷度盡千山無鳥
迹不勞傳語報平安

手在何憂弓力彊巧窮那得必穿楊太和有味人人
飲誰識醒時是醉鄉

仲由行行終身誦師也堂堂帶上書五柳却能知此
意無絃琴上賦歸歟

只說爲山不說休山成日夜水橫流惜哉覆篋成迷
復只欠當初一掉頭

和錢濟明游官園 常州

虛舟觸物本無意看花得句慙非才名園古寺尋春

色不暈勿鄙雙魚鰓

是日與濟明遍游太平諸院觀雙魚花抵暮至官園

木奴

千頭比封戶秋實付與江風催因思萬點愁人處何
似洞庭金作堆 蘇子美詩洞庭柑熟客分金

題陳宣事烟波泛宅

忘懷纓紱寄浮居來泛烟波擬釣徒我欲他時清洛
上爲君正櫓作鱗鱗

偶成

綠鬢潛驚老境催更憐衰晚困低回但知周道平如砥莫問瞿唐艷瀕堆

過吳江

天水相涵翠有餘玻璃萬頃接方壺山浮晚照清如洗風遠飛帆細欲無漫叟未應甘皂櫂散人終欲傲江湖維舟况值鱸魚美鱠疊銀絲飫腹腴

南歸書事

浪漫人間厭客塵衡門長憶鎖榆枌忘言擬盡輪人妙陳迹慵尋史籀文萬里功名心獨冷一廛耕鑿力

能勤舊游欲問南歸趣寂寞吾今過子雲

閑居書事

虛庭幽草翠相環默坐頽然草色間玩意詩書千古近放懷天地一身閑踈窓風度聊欹枕永巷人稀獨掩關誰信紅塵隨處淨不論城郭與青山
輕風拂拂撼孤檉庭戶蕭然一室清隔葉蟬鳴微欲斷又聞餘韻續殘聲

溪上

悠揚春夢成幽興冷落溪光醒酒魂天濶雲浮遮不盡浪平風過杳無痕

寸碧軒

隱隱遙山列畫屏
簷間寸碧與雲平
低回席上遺簪露
彷彿墻東翠黛橫
虛景遠涵千里色
晚暉仍借一溪清
春風景物知多少
可稱妝身樂此生

冬早書事

窈冥誰為宰
爐錕榮謝唯
知歲序催
臘日未經梅
已綻春風尚
遠凍先開
愁無潤澤歸
芳樹獨有餘
寒着死
萎妝盡浮雲
天愈淨
夜深猶起望
三台

齒落書懷

身上蕭條事事空
齒牙凋落勝衰翁
渴心尚欠冰凌

解病骨長思藥力
攻文几倦親塵土
暗斷編慵理蠹
魚封南牀穩卧陶公宅
枕上悠揚一榻風

與將樂令飲揖仙亭

灘派斗落堆璫瑛
雕欄照水光如濡
層巒疊嶽爭蟠
紆翠岩百尺蹲於菟
何年巨人出歸墟
揭竿合負神鼇趨
飄流人間峙蓬壺
至今猶為仙聖居
飛輶往來誰與俱
下有馴雉隨雙鳧
英風爽氣凌清虛
榻間新詩露珊瑚
顧余老懶與世疎
欲往勾漏嗟無徒
會須策轡追雲車
無使吃口唾癯儒

憑高

觸物心如醉，憑高仍倚樓。目隨流水遠，事託片雲浮。
戎虜川原赤，邊儲戍役愁。投戈知幾日，定遠未封侯。

送嚴尉

世路久艱棘，青冥翳妖氛。孤鳥叢祠中，豺虎填城闔。
君能摘姦伏，竭澤無潛鱗。勿云功未耐，屈蠖終當伸。
飛黃駕輕車，一躍窮無垠。

贈程舍人迎侍入闕

路公溪上鶴，髮翁眼光照。日顏如童尾，眉垂髮有仙。
骨駢集五福，天所鍾螭頭。暫輟三長手，仗節扶輿入。
閩嶠弧南一夜晶，輝浮海隅草木俱榮耀。朱金拜後

古所稀，繡紱全勝衣。綵衣玉觴薦壽酒，珍竒更待蟠

桃子熟時

鄒公輓辭二首

一伏青蒲上三年，瘴海濱泉甘不出戶。公謫南方所居苦無水處

中忽湧甘泉客醉豈無神。公在謫所忽有醉客言公將歸翌日赦至果得歸報國

心長在知恩，志未伸。公所居堂名知恩追懷垂絕語，空有淚

盈巾

舊德今誰在，彫零已不多。雲天開日月，陸海自風波。
空嘆與齡夢，難留曳杖歌。生平濟川意，無處問施羅。

公嘗有與齡之夢

龜山先生集卷第四



龜山先生集卷第四

